



16. august 2024

UKA 2024/117

Matumuuna Inatsisartut maleruagassaanni § 33 malillugu isummerfigisassatut una siunnersuutigineqarpoq:

Peqqissaanermi ikiortitut ilinniagaqarsimanerup pinngitsoorani peqqissaasutut ilinniaqqinnissamut aqquataaleqqullugu peqqissaasutut ilinniartitaanerup aqqissuussaanerani pisariaqartunik allangortitsinissamik sulissutiginneqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Anna Wangenheim, Demokraatit)

Tungavilersuut

Isummerfigisassatut siunnersuuteqarnermut siunertaavoq peqqinnissamut assistentit peqqissaasutut ilinniarnissamut tiguneqarsinnaalernissaat. Tamanna pissaaq ilinniarnerup aqqissuussaanerata peqqissaasutut ilinniarnermi naleqqussarneratigut. Taamaaliornermi siunissami peqqinnissaqarfitsinnut nukittorsaataassaaq peqqissaasut ilinniarsimasut amerlinerisigut.

Peqqinnissaqarfimmi sulissuusaqarniarnitsigut annertoorujussuarnik unammilligaqarpugut. Peqqissaasut piginnaaneqarluartut amigaatiginerat ilungersunarluinnarpoq, pisariaqartinneqartorujussuuvorlu peqqissaasunik amerlanernik ilinniartitsinissaaq nunatsinni peqqinnissaqarfiup piujuartuunissaa ingerlalluartuunissaalu qulakkeerniarlugu. Peqqissaasoq nakorsamut tapertaakkajuppoq, napparsimasut aqutissiuussuat (inatsilerituuat) taamaattumillu peqqinnissaqarfiup qitiulluinnartutut inissisimasunut ilaalluni.

Maani nunatsinni piffissami maani ilungersunarnerpaat ilaannik unammillernartuuteqarpugut: Peqqissaasunik piginnaaneqarluartunik amigaateqarneq. Peqqinnissaqarfippit inuiaqatigiitsinni toqqammaviulluinnartut ilaattut inissisimavoq, isiginngitsuusaaginnarsinnaanngilagullu sulisunik pissarsiniarnermi ajornartorsiutit ilungersunartut, maannakkut atukkagut. Piffissanngorpoq iliuuseqarnissaaq qulakkeerlugulu, nammineq innuttatta periarfissinneqarnissaat ilinniaqqinnissaannut, tamatta ataatsimoorussamik peqqinnissaqarfitsinnullu tapersiisussamik.

Peqqissaasutut ilinniarnerup aqqissuussaanerata naleqqussarneratigut peqqissaanermut assistentit pikkorissut pigerikkagut atorluarsinnaalissavagut peqqissaasutut qaffasissumik piginnaasalinngorlugit. Tamanna peqqinnissaqarfitsinnuunnaq nukittorsaataanani, aammali aningaasatigut isumaginnikkullu inuiaqatigiinni patajaannerup annertusarnissaanik kinguneqassaaq.

Demokraatit pingaarnerpaatut isigaat, peqqissaasut ilinniarnerata aqqissuussaanerata naleqqussarneqarnissaa imaasillugu, peqqissaanermut assistentitut ilinniarneq aammalu tulluuttumik sulinikkut misilittagaqarsimanerup tungavigissagaa siunissami peqqissaasutut ilinnialernissamut akuerisaanissaaq. Taamaaliornikkut peqqissaanermut assistentit ilinniarnermi sulinerminnilu piginnaasaat misilittagarilersimasaallu akuersaassavagut.

Nunagisaaq qimannagu peqqissaasutut ilinniarsimasut pitsaaqutai amerlaqaat. Nunatsinni peqqissaasutut ilinniartitsinitsigut peqqissaasunik piginnaaneqarluartunik pilersuinissaaq qulakkiissavarput, tamannalu



peqqinnissaqarfimmik nukittorsaataassaq nunaniillu allanit sulisussarsiortarneq pinngitsoorsinnaanngisarput appartinneqassalluni. Nunagisaq qimannagu peqqissaasutut ilinniagaqarsimasut Kalaallit Nunaanniiginnarlutik sulinissartik kajungerinerusarpaat, taamaaliornerullu peqqinnissakkut sulisunik amigaateqarnermut iluaqutaasarluni. Peqqinnissamut assistentit, peqqissaasutut ilinniaqqittut, maligassiuisunnngorsinnaapput piffimminnilu allat piumassuseqalersillugit peqqinnissaqarfiup iluani ilinniagaqarusunnermik piviusunnngortinnissaanut. Tamanna uanga nammineq misiginikuuara, qanittuaqqamik, meeraaqatigisimasakkannillu arlalinnik eqqoriarsinnaavara, uattuulli, peqqinnissaqarfiup iluani ilinniagaqalersimasunik, uppersarsinnaammassuk nunatsinni peqqinnissaqarfiup iluani sulisut sunnersimagaatsik inuunerminni ilinnialigassaminnik toqqaanerminni.

Nunagisaminni ilinniarsimasut peqqissaasutut amerlanerit kulturikkut nunallu inissisimaneranik immikkuullarequtaanik itinerusumik paasinnissinnaassapput, taamaanneratalu napparsimasunik paaqqinninneq aamma – passussinerup pitsaassusaa pitsanngorsaatigissallugu.

Tamanna tunngavigalugu neriutigaarput, Naalakkersuisut aammalu Inatsisartuni partiit sinnerisa siunnersuut taparserumaaraat.

Pisortanut aningaasatigut allaffissornikkullu kingunissai

Ilinniarnernerup aqqissuusaaaneraata allannguutissaanut pisariaqartunut annikittunnguamik aningaasartuuteqassaaq. Taakku atorfilittap ukiumut qaammatini sisamani akissarsiaasa (125.000 koruunit) qaangerneqarnissaat naatsorsuutigineqanngilaq.

Namminersorlutik inuussutissarsiuteqartunut aningaasatigut allaffissornikkullu kingunissai

Soqanngilaq.

Innuttaasunut aningaasatigut allaffissornikkullu kingunissai

Innuttaasut peqqinnissamut assistentit ilinniagaqarsimasut periarfissinneqassapput peqqissaasutut ilinniarnissamut tiguneqarnissaminnut ilinniarnertuutut ilinniaqqaanngikkaluarlutik.